

TULAFONO TAU FAAOFI O VAI PULEA TUMAOTI 2015

SAMOA

Faamatalaga e Faamalamalama ai

Faatomuaga

Ua taumafai le Tulafono Tau Faaofi ina ia amanaia faaletulafono Vai Tumaoti, e avea o se auaunaga e tuuina atu ai le suavai i totonu o afioaga. Ua aofia ai i totonu o Vai Tumaoti, vai pulea tumaoti o lo o pulea e nuu ma afioaga, lea o lo o tua i ai nuu ma afioaga i totonu o Samoa ma ua faapea ona faamauina i le Faalapotopotoga o le Polokalame o Suavai Tumaoti (Faalapotopotoga). O Vai Tumaoti, e lua i ai auaunaga i totonu o Samoa o lo o tuuina atu le suavai, o le isi o le Pulega o le Suavai a Samoa (SWA).

O Vai Tumaoti, o se tasi lea o vaega auai e i ai aia o lo o aafia i le Vaega o le Suavai ma ona Tulaga Tumama lea ua faailoagofie mai o se vaega ua tuuina i ai le faamuamua i lalo o Fuafuaga Faataatitia mo le Atinae o Samoa. O le sini aoao tau atinae o lenei Vaega, e pei ona faatulagaina mai i totonu o polokalame *O le Vai mo le Ola: Fuafuaga a le Vaega o le Suavai ma ona Tulaga Tumama 2012 - 2016*, o le faamautuina lea o le tulaga “*faatuuatuaaina, mama, vai e gafatia ona mauaina ma le tulaga mama e taua i le ata faataatia o le Faafoega o le Tuufaatasiga o Punaoa Tau Suavai mo tagata uma o Samoa, e faatumauina ai le tulaga lelei o le soifua maloloina ma faaitiitia ai le tulaga mativa*”. O le a faamautinoai ai foi i lenei Tulafono Tau Faaofi le i ai o se sao o Vai Tumaoti, i le siitia ma le faaleleia o avanoa o tagata i nuu i tua, latou te maua ai le suavai e lelei atoatoa, mama ma mauagofie, ma ia i ai o puipuiga lelei mai siama e maua i le suavai, e ala i le tuuina atu o auala aupito i sili ona taua i le tulaga tumama.

Ua faamoemoe le Tulafono Tau Faaofi ina ia:

- amanaia faaletulafono Vai Tumaoti e avea o se auaunaga e tuuina atu le suavai, e sui ai Komiti o vai na faavaeina i lalo o le Tulafono o Vai Paipa 1965, lea ua faapea ona soloia;
- faamalositia ai ana faatulagaga tau pulega ma faafoega;
- tuuina atu ai se faavae faaletulafono mo fesoasoani mai le Malo ma isi, e auala atu i le Matagaluega o Tina ma Tamaitai, Atinae o Nuu ma Afioaga ma Agafesootai (Matagaluega);
- tuuina atu ai se taiala talafeagai faaletulafono mo le tuufaatasia o auaunaga o Vai Tumaoti ma isi Vaega auai e i ai aia a lea Vaega; ma
- aiaia ai matafaioi e faamautinoai ai ua ausia tulaga faataatitia manaomia o vaiinu i totonu o le atunuu ma manaoga mo le tulaga tumama, aemaise ai foi le gafatiataulimaina o le pulega lelei o punaoa tau suavai.

Ua vaevaeina le Tulafono Tau Faaofi i ni vaega se fa (4) e faapea:

- Vaega 1 - Faatomuaga
- Vaega 2 - Vai Pulea Tumaoti
- Vaega 3 - Faalapotopotoga o le Polokalame o Suavai Tumaoti
- Vaega 4 - Aiaiga Eseese.

Fuaiupu:

VAEGA 1 - FAATOMUAGA

Fuaiupu 1: - ua taua ai e faapea, afai e pasia, o le a taua loa le Tulafono Tau Faaofi o le Tulafono o Vai Pulea Tumaoti 2015, ma o le a faamamaluina i se aso e filifilia e le Minisita.

Fuaiupu 2: - ua aiaia ai le faamatalaina o uiga o fuaitau.

Fuaiupu 3: - ua aiaia ai e faapea, e noatia le Malo i le Tulafono.

VAEGA 2 - VAI PULEA TUMAOTI

*Vaevaega 1 - Auaunaga o lo o
tuuina atu le suavai*

Fuaiupu 4: - ua aiaia ai mo le amanaiaina faaletulafono o Vai Tumaoti e avea o se auaunaga latou te tuuina atu le suavai.

Fuaiupu 5: - ua faamalamalama manino ai aia a nuu ma afioaga e faasino i o latou fanua faaleaganuu ia e faatafe atu ai le vai ma faaali manino ai e faapea, o le pule e umia ai ia fanua, o le a lē aafia ai i lenei Tulafono fou. O lenei fuaiupu ua atagia mai ai le fuaiupu 6 o le Tulafono o le Faafoega o le Faasoasoina Tatau o Punaoa Tau Suavai 2008 ma faamalamalama manino ai e faapea, e leai se vaega o lenei Tulafono o le a aafia ai aia tatau a nuu ma afioaga i o latou fanua faaleaganuu ma punaoa o i ai.

Fuaiupu 6: - ua faamalamalama manino ai le puleaga a le Fono a Nuu e faatatau i le puleaina o Vai Tumaoti i le amanaia ai o le tulaga o nuu, ia o lo o faia ai faatinoga o Vai Tumaoti, ma faatulaga atu ai ana matafaioi i le faavaeina o le Komiti o Vai a Nuu ma Afioaga ma le mataituina o ana galuega.

Vaevaega 2 - Komiti o Vai a Nuu ma Afioaga

Fuaiupu 7: - ua aiaia ai mo le faavaeina o se Komiti o Vai a Nuu ma Afioaga (CWC) ma ona sui auai.

Fuaiupu 8: - ua aiaia ai le vaitaimi i le tofi o sui auai o le Komiti o Vai a Nuu ma Afioaga.

Fuaiupu 9: - ua faatulaga atu ai galuega tauave ma malosiaga o le Komiti o Vai a Nuu ma Afioaga e uiga i ana galuega i le aveai ma auaunaga e tuuina atu le suavai.

Fuaiupu 10: - ua aiaia ai tulafono faafoe o fonotaga a le Komiti o Vai a Nuu ma Afioaga.

Fuaiupu 11: - ua aiaia ai mo tupe a le Komiti o Vai a Nuu ma Afioaga ma manaomia ai se sui o le Komiti o Vai a Nuu ma Afioaga na te amataina se teugatupe i se faletupe, ma faamautinoa ai e faapea o tupe uma ua aoina ma taulimaina e le Komiti o Vai a Nuu ma Afioaga, e tataua ona teuina i totonu o lea teugatupe.

Fuaiupu 12: - ua tuuina atu ai le malosiaga i le Komiti o Vai a Nuu ma Afioaga e faaoo atu ai le suavai i se tagata o se nuu ma faaee atu tuutuuga mo le tuuina atu o le suavai.

Fuaiupu 13: - ua tuuina atu ai le malosiaga i le Komiti o Vai a Nuu ma Afioaga e faapipii, tausia ma asiasia paipa, ogapaipa ma meafaigaluega mo le faamoemoe o le tuuina atu o le suavai. Ua faaee atu ai se noataga i tagata uma o le afioaga o lo o faaogaina le auaunaga, ina ia tausia i se tulaga lelei paipa ma vaega uma e fesootai i ai, ma tuuina atu ai le malosiaga i le

Komiti o Vai a Nuu ma Afioaga e motusia ai le suavai pe afai ua maua i se asiasiga ua solia se tuutuuga o le tausia lelei o paipa, ina ia foia ai le faafitauli e pei o le faamaimauina o le suavai ona o ni paipa ua mama.

Vaevaega 3 - Totogifuapauina

Fuaiupu 14: - ua aiaia ai e faapea, o totogifuapauina ua faamaonia e le Fono a Nuu, e tatau ona faatonuina i totonu o tulafono faatonutonu ma ia totogiina i totonu o le 30 aso mai le taimi na faatupulaia ai.

Fuaiupu 15: - ua tuuina atu ai le malosiaga i le Komiti o Vai a Nuu ma Afioaga e fuafuaina ai totogifuapauina e mafai ona gafataulimaina e tagata o le afioaga lea o lo o faaaogāina le suavai, i le noatia ma le fai fuafua i le faamaoniga a le Fono a Nuu.

**VAEGA 3 - FAALAPOTOPOTOGA O LE
POLOKALAME O SUAVAI TUMAOTI**

Vaevaega 1 - Faalapotopotoga

Fuaiupu 16: - ua aiaia ai mo le faaauuina o le Faalapotopotoga o le Polokalame o Suavai Tumaoti (Faalapotopotoga), lea na tuufaatasia faaletulafono i lalo o le Tulafono o Sosaiete Tuufaatasi 1952, ma faavaeina ai e avea o se faalapotopotoga faaletulafono.

Fuaiupu 17: - ua aiaia ai le faamauina o le Komiti o Vai a Nuu ma Afioaga e avea ma sui o le Faalapotopotoga.

Fuaiupu 18: - ua aiaia ai galuega tauave ma malosiaga o le Faalapotopotoga, le faatauina o ana matafai oi autu ia e avea ai ma sooupu mo nuu ma afioaga ma le Matagaluega faatasi ai ma le Vaega o le Suavai ma ona Tulaga Tumama. Ua faapea foi ona tuuina atu ai malosiaga talafeagai lautele e tauaveina ai ana galuega tauave.

Vaevaega 2 - Komiti o le Pulega a le Faalapotopotoga

- Fuaiupu 19:** - ua faavaeina ai le Komiti o le Pulega a le Faalapotopotoga lea e aofia ai sui auai e 11, e filifilia mai i se Fonotaga Aoao Faaletausaga. Ina ia faamautinoa ai le aofia ai o tamaitai i lea tulaga, ua i ai foi se manaoga faapitoa mo ni sui tamaitai se toalua (2) la te tauaveina le tofi.
- Fuaiupu 20:** - ua aiaia ai mo vaitaimi i tofi o sui auai o le Komiti o Pulega.
- Fuaiupu 21:** - ua aiaia ai mataupu e faasino i se faamavaega a se sui auai, mafuaaga ua aveesea ai se sui auai, ma le taimi e avanoa ai se tulaga tofi o le Komiti o Pulega.
- Fuaiupu 22:** - ua aiaia ai galuega tauave a le Komiti o Pulega, lea e aofia ai le faafaigaluegaina o tagata o le aufaigaluega, ma tuuina atu ai malosiaga lautele talafeagai mo le tauaveina o ana galuega tauave.

Vaevaega 3 - Fonotaga

- Fuaiupu 23:** - ua aiaia ai tulafono faafoe e ao ona faaaogāina i se Fonotaga Aoao Faaletausaga (AGM) a le Faalapotopotoga.
- Fuaiupu 24:** - o le malosiaga o le Komiti o Pulega e taloina ai se Fonotaga Aoao Faapitoa (SGM) a le Faalapotopotoga ma manaomia ai le lomina faasalalau o se faasilasilaga e le Failautusi.
- Fuaiupu 25:** - ua aiaia ai mo tulafono faafoe e faaaogāina a o faagasolo fonotaga a le Komiti o Pulega.
- Fuaiupu 26:** - ina ia faaaogāina aiaiga lautele e fesootai i tulafono faafoe ia e ao ona faaaogāina a o faagasolo se fonotaga a le Fonotaga Aoao Faaletausaga, Fonotaga Aoao Faapitoa po o se fonotaga a le Komiti o Pulega.
- Fuaiupu 27:** - ua manaomia ai le Failautusi ina ia teuina oototoga o iugafono uma e pasia i so o se fonotaga.

Vaevaega 4 - Tupe ma teugatupe

- Fuaiupu 28:** - ua aiaia ai se manaoga mo le faavaeina o se Teugatupe mo le Faalapotopotoga, aemaise o tupe uma ua taulimaina ina ia faapea ona teuina i totonu o lea Teugatupe.
- Fuaiupu 29:** - ua faaee atu ai se manaoga mo faiga manino ma le mafai ona tali atu o le Faalapotopotoga ina ia teuina faamaumauga faatausi tusi, ma ia i ai faamaumauga tau tupe ua maea ona sueina faasuetusi; ma ia faaoo atu tala o tupe ua maea ona sueina faasuetusi i ona sui auai i le Fonotaga Aoao Faaletausaga.
- Fuaiupu 30:** - ua aiaia ai mo totogifuapauina a le Faalapotopotoga e aofia ai totogifuapauina o le aveai ma sui, ma isi tulaga faapena, ia ua i ai i le Faalapotopotoga le malosiaga e faatulaga ma manaomia ai ona sui e totoigiina i le amataga o tausaga taitasi faale-kalena.

Vaevaega 5 - Fesoasoani a le Malo

- Fuaiupu 31:** - ua aiaia ai e faapea, e mafai e le Malo ona tuuina atu fesoasoani tau tupe ma isi ituaiga fesoasoani mo Vai Tumaoti e ala atu i le Faalapotopotoga.
- Fuaiupu 32:** - ua manaomia ai le Faalapotopotoga ina ia amanaia faiga faavae a le Malo ma fuafuaga pe a faatinoina ana galuega tauave ma malosiaga e faasino i gaioioiga o Vai Tumaoti ma le Komiti o Vai a Nu'u ma Afioaga.

VAEGA 4 - AIAIGA ESEESE

- Fuaiupu 33:** - ua tuuina atu ai le malosiaga i le Faalapotopotoga e atiae ai ana ia lava tulafono faafoe mo le foia ai o feeseeseaiga, po o i se isi faiga e ese ai, ia faaaogāina aiaiga o le Tulafono o Isi Iuga a le Faamasinoga e Foia ai ni Feeseeseaiga 2007.

- Fuaiupu 34:** - ua aiaia ai le pui puiga o so o se sui auai, tagata ofisa, tagata faigaluega po o se sooupu a le Faalapotopotoga po o se sui o le Komiti o Vai a Nu'u ma Afioaga, mai so o se noataga tau le tagata lava ia, mo gaoioiga ma faaiuga ua faia i le agaga lelei pe a faatinoina galuega tauave ma malosiaga i lalo o le Tulafono.
- Fuaiupu 35:** - ua faia ai se soligatulafono lautele e faasaga i so o se taimi e solia ai aiaiga o lenei Tulafono ma se faasalaga lautele.
- Fuaiupu 36:** - ua tuuina atu ai le malosiaga i Le Ao o le Malo, i le faia i luga o le fautuaga a le Kapeneta, e faia ai tulafono faatonutonu.
- Fuaiupu 37:** - ua aiaia ai mo aiaiga tau soloaiga ma aiaiga faasaoina.

.....
(Hon TUILAEPa Fatialofa Lupesoliai Aiono Neioti Sailele Malielegaoi)
PALEMIA MA LE SUI MINISITA O TINA MA TAMAITAI,
ATINAE O NUU MA AFIOAGA MA AGAFESOOTA